



ATASSUT

Steen Lynge

UKA 2015/106

25.11.2015

**Kalaallisut oqaatsitta qanoq tusagassiutini nukittorsarneqarsinnaanerannik qaffassar-
neqarsinnaanerannillu apeqquteqaat aallaavigalugu oqallisissiaq**

(Inatsisartunut ilaasortaq Mimi Karlsen, Inuit Ataqtigiit)

Aallarniutigalugu Inuit Ataqtigiit sinnerlugit Inatsisartunut ilaasortaq Mimi Karlsen kalaallisut oqaatsitta qanoq tusagassiutini nukittorsarneqarsinnaaneri pillugit apeqquteqaat aallaavigalugu oqallisissiamik saqqummiussineranut ATASSUT-mit qutsavigalutigu imatut naatsumik oqaaseqarfigissavarput:

ATASSUT-mit arlaannaatigulluunniit siunnersuut isornartoqartinngilarput aamma isumaqarpugut pingaaruteqartuusoq nunatsinni kalaallisut oqaatsitta tusagassiutini nukittorsarneqarsinnaanerannik qaffassarneqarsinnaanerannillu periarfissanik ujartuisinnaaneq aammalumi inerisaaqataasinnaaneq.

Naalakkersuisut akissuteqarnerminni ilaatigut tikippaat Oqaasileriffimmiit ilaatigut kalaallisut oqaatsit suliffeqarfinnut oqaatsinik sulialinnut tunngatillugu ataqtigiissaakkanik pitsaasunillu tunngavissiisoqartariaqartoq, tamannalu ATASSUT-mit arlaannaatigulluunniit assortorsinnaanngilarput, taamaattumik aamma ATASSUT-mit Naalakkersuisunut kaammattuutigissavarput maannakkut KNR-imik kiffartuussinissamut isumaqtigiissutsip ukiunut tulliuttunut atuuttussap isumaqtigiissutiginiarnerani Naalakkersuisunit qulakkeerniarneqassasoq annertunerusumik kalaallisut oqaatsit tungaatigut nukittorsaanissamik suliniutit timitalersorneqarnissaat.

Taamatuttaaq aamma ATASSUT-mit Oqaasileriffiup oqariartuutai taperserumavagut, oqaatigimmassuk Kalaallit oqaasiinik ilinniartitsinerup nukittorsarneqarnissaanik qulakkeerinnittoqartariaqarnera, assersuutitullu oqaatigineqarluni *”ilinniartitsisunngorniat ilinniartitaaneranni kalaallit oqaasiinik ilinniartitsisussat ilinniartitaanerata pitsaanerulersinneqarnissaa aamma kalaallit oqaasiinik oqaasilerinermik ilinniartitsinermi*



ilinniartitsinermut atortussat pisariaqartinneqartut eqqortullu piginissaat assut pisariaqartinneqarput”.

ATASSUT-mit ataasiarata tikkuartarnikuuvarput kalaallisut oqaasilerinermik ilinniartitsinerup nukittorsartariaqarneranik suliniutit annertusarneqartariaqartut, soorlu aamma kalaallisut oqaatsit pingaarnertut oqaaserinngisatut immikkut ilinniutigineqarnissaanut ilinniartitsisinnaanissamut ilinniartitsisunngornianut periarfissaqartitsilersinnaanissaq eqqarsaatigalugu.

Naggataatigut ATASSUT-mit manna iluatsillugu kaammattuutigerusupparput tamatta sapinngisamik immitsinnut oqaatsit eqqortumik atornissai siammarterumallugit kajumissaareqatigiittarnissaq eqqaamaniaqqullugu, taamatut kaammattuuteqarpugut eqqumaffigatsigu arlaatigut oqaatsinik atuinermi kukkusoqaraagat ilaanneeriarluta pikkorippallaalaartannguatsiaratta kukkussuteqartumut isornartorsiunissatsinnut, annerusumillu qanoq pitsaannerusumik eqqornerusumilluunniit oqaatsinik atuisinnaaneranut naqqiuteqarata – tamanna pingaartumik danskisut oqalunnerusunut imaluunniit inuusuttortatta akornanni kalaallisut eqqornerusumik oqalunnerulerusuttunut kajumissuseeruttitsisinnaasarmat, inoqativut ataqqillugit immitsinnut kajumissaareqatigiinneq atortigu.

Taamatut ATASSUT-mit naatsunnguamik oqaaseqarluta siunnersuuteqartoq kingumut qutsavigeqqissavarput taamatut oqallisissiamik saqqummiussineranut aammalu Naalakkersuisut akissuteqarnerminni saqqummersimmatigut oqaatsit pillugit suliniutit maannakkumut suut ingerlanneqarnerisut, taamaasilluta siunnersuuteqartup Inatsisartut oqaaseqaatissaatut siunnersuutaa ATASSUT-mit taperserparput.